

武夷山志卷之十八

武夷董天工典齋氏編

籍溪羅良嵩極重刻男才育樂三氏校刊繪經甫

方外

仙

陶唐

彭祖姓錢名鏗相傳古陸終氏第三子也亦謂之中黃君傳稱其嘗進雉羹於堯堯封之彭城故稱彭祖又有曰商賢大夫即所謂老彭隱居是山善養生術壽七百七十七歲子二曰武曰夷同居于此或曰山因是得名

武夷山志

卷之十八

仙

彭祖之事幻妄不經靈均天問所云彭鏗斟雉帝何享壽命永多夫何長正以其事為不足憑後世尚奇反摭拾而為列仙傳謬矣其傳中六十七妻等事尤不雅馴。論語疏鏗在商為守藏吏在周為柱下史

秦

皇太姥相傳為神星之精母子二人來居武夷採黃精以餌能呼風檄雨乘雲而行秦人呼為聖母眾仙稱為皇太姥今稱太元夫人

武夷君相傳昔有神仙降山中自稱武夷君受上帝命統錄羣仙授館於此漢武帝時遣使祀之宋紹聖三年禱雨獲應現相雲中封顯道真人元符元年進封真君端平元年加封顯道普利嘉熙元年又加冲元字云

劉少公舊稱武夷山主雲笈七籤云武夷爲昇真元化洞天真人劉少公治之

控鶴仙人名屬仁乃天台元虛老君華真僊師第七子也嘗駕鶴至武夷時魏王子騫與張湛等禱雨龍潭而僊人適至騫等具懇遂獲甘霖湛因獻詩曰武夷山上武夷君白馬垂鞭入紫雲空裏只聞三奠酒龍潭波上雨紛紛屬仁見子騫等丰骨異常訪道精確乃遣何鳳兒往天台取仙籍檢視具載子騫與湛等先以飲酒過度忤黃元真人謫居此山八百年後仍得脫骨仙化因授以九品丹書

武夷山志

卷之十八

仙 二

國朝董天工查本朝王志削去湛獻詩謂據蕭子開建安記載云湛獻詩乃沈韻唐體截句又謂詳玩詩語當是宋紹聖間禱雨於武夷君道流迎神送神之曲悞爲湛獻詩予編山志亦從王志刪削忽一夜夢在琢玉齋頭見一仙騎鶴懸空而至黃髮束髻面長棗色兩夾輔有卷鬚全身鶴羽問予曰聞子在此修山志湛與我詩載否予應曰載矣仙曰此乃真詩也前志俱載後志謂悞削去錯矣今載便是但聞鶴翎浙浙從空而去今從前志載入

十三仙魏王子騫張湛孫綽趙元奇彭合昭劉景顧思遠白石生馬鳴生胡氏李氏魚道超魚道遠子騫或曰魏國王子或曰魏時人姓王名子騫或曰不知何許人或曰延津人皆不可考山南十里有魏王故城相傳爲子騫所築中有王城廟湛等十二人亦不知何許人白石

生或稱白玉生或稱白石先生或止稱白石馬鳴生又稱馬鳴先生俱未知孰是胡李及二魚皆女真稱為毛女子騫學仙於武夷居大王峯下十二人亦以修煉來山中依子騫為地主後皆仙去子騫蛻骨在小藏峯其頭顱尚在仙館巖罅中紹興十八年封子騫冲妙真人端平元年加封冲妙孚惠又封湛以下俱真人嘉熙二年進九真人俱真君四女真人俱元君封號詳見誥命潘遇崇安人先世居中奢地名在山南因魏王子騫給奉張湛等十二人移居武夷山中亦仙去稱為從神端平元年封通靈協濟侯嘉熙二年又增協濟妙感侯

武夷山志

卷之十八

仙 三

漢

張垓後漢時候官人或曰晉人初至武夷隱姓名有自草石中拾一古木牌題姓名其上一日登大王峯石巖中坐化遺蛻至今在焉其首右顧相傳將解時其母追至呼之是以顧視巖下云背有白點如錢者六七手有杰字坐旁方石樵者嘗見其上一金蟾蜍昂首向蛻因號為張金蟾萬厯初直指楊四知見其裸裎近褻塑而飾之仍護以鐵欄云今像在欄廢

張金蟾諸志皆名垓閩大記作張淡或因淡與湛音悞但湛在十三仙中為秦時人垓為後漢人時代甚明何容疑誤

〔晉唐〕

婁師鍾晉時人 薛邴唐時人 李鐵笛洛陽人 李磨
鏡燕山人此四仙者或傳其時或傳其地事實俱無可
考二李並名字失之又八曲鼓子洞有 張草衣亦無
名代白玉蟾記謂俱於止止庵仙去

孔莊葉三女仙俱會稽人唐天寶間來武夷學道棲天柱
峯下一日遇皇太姥授以丹訣指往東南覓修煉之所
乃於均峯得雲虛洞居焉道成投身換骨巖仙去詳見雜錄

許碓唐時高陽人自稱高陽酒徒少舉進士不第學仙於
王屋山遍遊名山嘗至武夷絕頂題云許碓自峩山尋

武夷山志

卷之十八

仙

四

偃月子到此又題詩云閩苑花前是醉鄉踏翻王母九
霞觴羣仙拍手嫌輕薄謫向人間作酒狂或詰之曰我
為就宴崑崙失儀見謫眾目為顛後忽乘雲去

〔南唐〕

李良佐字元輔南唐元宗璟之弟也性冲淡保大八年辭
璟訪道入武夷遂居焉舊觀在洲渚間璟勅有司移剏
今址賜額會仙册封演道冲和先生又鑄鐘重千餘觔
自金陵航海至閩良佐居武夷三十七載坐化於觀之
清虛堂其弟元真適至藏蛻於觀後今武夷祀之以為

開山之祖

按大鐘懸漢祀亭側順治初年建陽羣盜至疑其金也碎之乃倭銅甚可惜耳舊志以良佐載諸羽流邱永錫崇安縣志目之爲仙今從之

宋

鄒錄事失其名趙清獻公宰邑時應役爲錄事奉公甚謹一介不取公秩滿貧不能歸鄒鬻田得錢百緡以助行公不受鄒曰業已鬻失祖父田錢無所置公詢之果然乃受之鄒自是棄妻子入武夷後得道尸解於幔亭

吳懷玉崇安新豐人居武夷老無衰顏行坐閉目人問之

曰俗無可觀因號眇翁年九十六無疾而逝

詳見雜錄

葛真人 詹真人名代皆不詳僅見於白玉蟾雲窩記所

武夷山志

卷之十八

仙

五

謂靈巖之葛鼓樓巖之詹是也二曲靈巖石穴相傳昔有巨蟒吐氣傷人葛除之卽其地創庵以居至今有葛仙館馘妖洞之稱詹亦曾驅踞洞之蟒亦卽其地創庵居之但蹟在九曲雲巖洞庵曰雲巖庵與白記所云鼓樓巖者有異是一是二莫可考矣

李仙 羅仙俱無名代事蹟惟四曲鳴鶴峯之西南一高峯上有石洞陡險稱李仙巖相傳爲李仙坐蛻處武進白僉事悅題詩甚稱之或亦別有考據耶羅仙人者前志以爲廬山人得寶印元文於一曲之換骨巖仙去

吳公 邱公名代亦失傳吳在八曲鼓子峯右石室中修

煉一日將炭畫階級于石壁隨畫隨登遂冲舉今稱石壁爲吳公洞邱在九曲靈峯左石室修煉一日坐化留詩曰本是瀛洲仙子徜徉元化洞天笑指蓬萊歸去冲飛直入蒼烟今名其洞爲邱公洞

知微子樵陽人或曰姓孫失其名字嘗採藥武夷結茅於一曲之毛竹洞餌松飲水得冲舉術有知微子一卷行世蘇文忠爲之叙

徐熙春邵武人宋熙寧時業市酒有韋道人者乞酒於其婢輒與之熙春覺撻婢傷膚道人與以百傷丸立瘥且教以製法傾餘水於井令再造必取此水丸治百病今

武夷山志

卷之十八

仙

六

遺方尚存有驗熙春嘗夢鐵冠道人揖之語旦至城南五峯院得之如所夢者自言姓蔡任武夷遺熙春五花草食之由是絕粒蔡約以某日會武夷如期而往蔡已先在熙春以水深不能渡止金身院修煉後坐化于大王峯東壁今遺蛻猶存其容欣然如含笑云

陳冲素字虛白時地皆不可考修道武夷著規中指南盡發內丹三要之旨嘗與樵者飲忽仆地夢入一洞食青靈芝卽絕粒後仙去

李陶真東京人熙寧末至武夷居一曲止止庵出牒示人乃唐開元時所給衆皆笑之好吹鐵笛每作穿雲裂石

之音值臘節道士各招飲李俱赴之諸房笛聲一時同發衆駭之後又居建平里之通仙巖一日留詩別衆云毛竹森森自剪裁試吹一曲下瑤臺當途不遇知音者拂袖白雲歸去來衆聞笛聲隱隱漸遠不知所適

王文欽不知何處人舊志載八曲石鼓道院爲唐侍宸王文欽修煉之所考閩之省郡邑志均失載惟隨遇堂集中有傳謂江閩之間稱王侍宸者乃南豐羽士宋時賜號之仙人王文卿也閩大記稱文卿宣和間來建寧又名顛道人一日風雲晦冥登樓視之不見其處以二說叅之當卽其人或傳聞異詞訛卿爲欽訛宋爲唐耳

武夷山志

卷之十八

仙

七

黃樸樵川人紹興初訪道武夷遇仙授能絕粒後坐化於

三仰峯

詳見雜錄

白玉蟾字如晦號瓊瑄又號雲外子本姓葛名長庚祖有興閩清人司訓瓊州紹興初王蟾生於瓊父歿隨母適白氏因冒其姓幼敏慧十歲應神童科主司命賦織機詩卽應聲曰大地山河作織機百花如錦柳如絲虛空白處做一匹日月雙梭天外飛其後屢試不第拂袖入羅浮得洞元雷法能呼召雷雨生平文思汪洋頃刻數千言善詩其草書有龍翔鳳翥之勢復遍遊名山後至武夷曾講法於冲佑之采隱堂居止止庵有自讚云千

古蓬頭赤脚一生服氣餐霞咲指武夷山下白雲深處
吾家嘉定間召對稱旨館太乙宮一日不知所往詔封
紫清明道真人有瓊瑄集行世彭鶴林云玉蟾嘗夜過
鄱湖剪紙爲月噓於檣端照行達旦又與衆泛西湖酒
酣躍入水尋於海豐見之

郭道人隱其名自稱卧雲子能預知人禍福紹興間至湖
州遇 諸葛行正言其生平如目覩行正遂師事之偶
入市有人指之曰此人吾見其死於京師何以在是郭
語行正人旣識我不可久居乃同行至壽春不辭而去
越三年復至行正事之如初因有密授俱入武夷乾道

武夷山志

卷之十八

仙

八

中同日坐化行正號洞陽子

徐頤崇安石雄里黃連坑人嘗於三髻山

崇安別山非
本山三髻峯遇

仙對奕啖其餘菓歸卽辟穀乾道間歲旱邑令諸葛廷
瑞召之祈雨頤登永隆寺鐘樓望三髻招呼之朶雲西
來須臾大雨後坐化鄉人祀之名其庵曰望仙復有人
於昇真洞見之

黃咸中東陽人曾宿止止庵遇異人授以仙術

詳見
雜錄遂棄

家遍遊訪道後住洞空山二十年號洞空子歸武夷年
九十坐化

元

金志陽號野庵永嘉人素不櫛髮人呼爲金蓬頭結庵於
龍虎聖井山病者求藥卽餌以所供菓餅無不立愈嘗
因旱登井召龍出龍漸小躍入袖中乃警以偈縱之卽
雨後至武夷居一曲之復古洞及止止庵不爐不扇至
元間坐化旬餘體顏不壞

明

蔡雙髻不知其名自云河南人少業儒中歲棄家入終南
山後至鵞湖時費文憲公家居知其異人留數載旣而
棲武夷山北之水簾洞五六年或數日不食人與語多
不答一日失其所在或見之終南云

武夷山志

卷之十八

仙

九

王廣崇安人幼嘗墮水忽一僧挾之出嘉靖中學道武夷
水簾洞勵志勤苦遇異人指授每行人遠望之有兩身
焉自刻時日沐浴別衆端坐而逝翼日鼓子峯道人見
廣來索所借木魚持還之不知其已解也今遺蛻見存
洞中

草鞋仙萬曆時人居武夷杜葛巖日織草鞋以市後經年
不見或詣其室屍已枯矣乃議瘞之憐其裸爲製衣服
將殮肢體柔和竟可扶坐衆咸驚異因卽巖鑿石爲龕
厝焉康熙間王適菴至梧峯僧衍操爲道其事同往觀
之衣朽無存而皮肉未毀首微俛瞑目趺坐鬚髮宛然

計之蓋已百年矣龕之額鐫歛西程良初五字

佛

唐

扣冰古佛姓翁號藻光崇安吳屯里人先世居長安父承贊字文堯唐乾寧三年進士拜右拾遺天祐初以冊封王審知至閩中原多故遂卜居於崇有詩名多著述嘗夢老比丘荷錫求宿有侍者曰此辟支佛也既而母孟氏生藻光異香滿室十歲欲出家父母念夙夢聽之杖錫雲遊往叅雪峯禪師初至庭雪峯探其造悟曰進則死退則亡答曰橫行數步又何妨比辭歸雪峯送之曰

武夷山志

卷之十八

佛

十

子異日必爲王者師又愿遊四方一日忽悟曰欲會于江明月止在一輪光處何勞破此芒鞋耶遂求靜僻掃跡塵魔以成定慧每日問主人翁曰惺惺否隨自應之曰惺朱子嘗引此以明誠意之旨冬月扣冰而浴故號扣冰會棲止武夷之桃源洞後結庵將軍巖二虎常侍側緇流爭販之有問之者曰何不誦經曰心心常念何不禮佛曰念念常敬何不升座曰空空無說又嘗曰心炎久撲滅扇不動死灰雖非上乘其辟支之力如此閩王延鈞聘至福州郊迎隆禮因誠曰願王以百姓爲念勿多殺延鈞送居鼓山翼日說法留偈而化今縣北吳

屯之瑞巖寺乃古道場當其別鼓山時有誓願百里永
無大災之語厥後弭寇禦災果著靈響其生以會昌甲
子二月初八日至今屆期迎奉萬眾炳燭宋時嘗累封
靈感法威慈濟普照大師平生行實則有呂丞相贊翁
考功記趙清獻劉少傅劉文靖朱文公游莊簡諸公詩
其護法神曰顯仁靈佑侯協仁孚佑侯輔仁廣佑侯士
人稱唐葛周三將軍

羽流

宋

王通永平人學道武夷毛竹洞能飛神御氣呼召雷雨宋治平三年辭衆往黃柏山坐化詔封洞明普靜真人

江成真號心隱南宋時建陽人少入武夷從張巖隱遊清修甚謹以祈雨聞於朝授道判晚築室水簾洞修丹坐化

江師隆號三白建陽人本儒家子風儀秀拔以父命修道武夷得異術能致雷雨紹定中錢塘有水孽詔赴闕以法平之賜號金門羽客乞歸武夷眷賚優渥御書常庵

武夷山志

卷之十八

羽流

十二

二字賜之庵在一曲堦整峯麓仍奉旨督臨安諸祠觀嘗大修冲佑觀又請加武夷十三真君及同亭潘侯封號浦城徐文靜忠簡兄弟甚敬禮之後坐化於常庵中

林壑堂

劉夢鼎號竹所崇安人忠顯公會孫也母夢羽衣客捧鼎來寄因有孕及朞乃誕遂以命名少聰明博學長而好清微道法行靈寶醮事多驗會建錄齋於邵武九龍觀枯井湧泉天降甘露一日在南浦遇一道士稱爲武夷侍者迓公回山倏不見歸家沐浴更衣坐化

陳丹樞不知何許人辟穀不粒終日凝神不語興寢談笑

與常人異年至八旬其顏如童附身僅一破衲結廬于接笋峯下曰雲窩白玉蟾爲記稱爲先生山中人言其所居石曰石竈至今猶存

陳洪範字天錫號浩齋喜種橘所居題曰橘隱白玉蟾爲記稱其丰神骨範云

劉妙清女道士東陽人入武夷山修道恬澹清苦遺世出塵師事陳丹樞附其廬結數椽以居取何仙姑幽居山林間荆棘隱此身之句題曰棘隱庵白玉蟾作記廣引古今列女登仙者况之

元

武夷山志

卷之十八

羽流

十三

王與敬號秋崖三山人居武夷山嘗遊雲州求雨大應城中有妖治之頓滅當事薦於朝授號至道元應通妙法師至大間乞還山有句云依然拂袖歸山去止止庵前伴白雲

彭日隆號隱空崇安人初爲萬年宮新戒遇異人傳授雷法禱雨極驗和陽道院於九曲虞文靖公集爲之記初未嘗學問讀清淨經有悟信口吟咏頗有理致嘗自讚云五五二十五只管從頭數到底一也無松梢月當午卒時正七十五歲

張與玉號霜崖三山人博雅善詩遇異人得秘術禱求立

應居武夷羽流多從學聞憲薦授法師無疾而化

張克真號平心三山人居于武夷崇安光化寺有狐爲祟
召雷斃之福寧州早投符龍湫遂雨州人羣送過飛鸞
渡遇風舟皆覆惟克真所乘無恙乃誦咒書空作符溺
者胥浮出無損張天師薦於朝及命下已羽化矣時年
七十

張志道號原中崇安人居武夷深究元理博綜三式之書
或薦於朝以疾辭

林文能號存心三山人博覽羣書頓悟元妙嘗獲銅符治
病立驗善熊經鳥伸之術不畏寒暑居大王峯頂辭召
武夷山志
卷之十八 羽流 十四
不赴賜號講師泰定間無疾而化年九十五天鑑池側
所遺石曰乃其結廬處也 程斯道師事之居止止庵
元末詔至京賜號通元子

余復嬰元末羽士也居復古洞能詩與藍山兄弟倡和

明

汪三寶字麗陽號痴願鉛山人 一云貴溪 劉端陽號古松建昌

人同學元風以詩文書畫相友善嘉靖間至武夷創元
元道院於接笋峯頂閉戶清修灑然出塵人稱汪劉二
高士汪有集曰野懷散藁徐興公亟稱之

張延安崇安人嘉靖間遊京師祈雨有驗詔封贊教真人

復歸武夷坐化

張三丰俗呼張邈邈嘗遊武夷飲通仙井水曰不徒茶美亦此水之力也

周千秋字喬卿號一邱莆田人文雅能詩與謝在杭方伯友善晚歲目瞢入武夷築室於山北之碌金巖靜攝數載復明七十餘披閱不倦燈下猶能小楷後其子迎歸養踰數年無疾而化其徒何一鶚字翔宇亦能詩

黃合賢號知白大梁人少好道入三茅山有閔希言者三百餘歲矣合賢師事之獲秘授逾七旬顏如童子晚剏知白庵於七曲三隱臺萬曆初有懿旨擇高真檢道藏

武夷山志

卷之十八

羽流

十五

僉舉合賢應召旋受寵褒後無疾而化

江一源嘉靖間居止止庵能詩與傅汝舟嘗倡和

國朝

鍾全容號大拙房縣人左目重瞳棲大王峯頂二十餘年于康熙初年坐化

任圓智號若愚鉛山人事母孝母歿居鶴巖精于數學嘗往建寧問易于任上鼻辭歸鼻送之曰不意吾儒之易今爲道人得去抵山三日坐化年五十九葬于垵壑峯下

金象字乾陽號鶴奴新安人初入三茅修道繼居羅浮二

十餘年後至武夷結廬大隱屏之巔題曰隱屏仙居年
逾七十陟降險徑如坦途狷潔冲靜能詩善書畫或謂
早爲諸生棄而入道者也康熙初年坐化

鄧行達江西人居止止菴二十餘年日事種植以供大衆
自甘淡泊卽賣菜得錢亦歸常住卒前數日衣冠辭別
各菴至明趺坐而化

潘養素福州人康熙甲子乙丑間坐化於一曲之紫雲洞
又建昌 劉教龍字虛中以名家子有託而逃元踵事
紫雲閉關幾二十載至庚寅亦無疾而逝

虞啟祚字湛錫崇安人與藍文秀重爲募建冲佑觀法堂
武夷山志
卷之十八 羽流
十六
及東西兩廊各十八間能繼先志建寧太守張公琦以
函闕紫氣額旌之

釋子

明

慧明族里無考天啟初從南海來結茅於火焰峯頂不下山者四十餘年跌坐而化

元鏡字晦臺號湛靈建陽洪氏子嗣法壽昌會任武夷虎嘯巖晚又於一曲石瓶巖結茅以居一日指巖下謂徒曰此處可埋我遂瞑江右詞部黃公端伯撰塔銘有語錄詩集世稱東苑鏡禪師

道盛字覺浪別號夢筆杖人浦城張氏子幼業儒從元鏡出家一日聞猫子墜地聲豁然有省遂閉目夢筆山又

武夷山志

卷之十八

釋子

十七

從壽昌博山盡得曹洞宗旨歸侍東苑歿始出坐道場五十餘處開法南都宗風大振其及門皆遜跡巨公

江寧倪民部嘉慶其最著也初道盛從師住武夷數年拜經於二曲虎嘯洞勒字於土地嶺之石壁曰西來巖時崇正庚午歲也

國朝

海靖延平人善詩及畫有武夷圖志嘗同天使往琉球國圖其山川以歸卽胡獻卿也後爲僧

克信號節菴蘇州人善山水及詩寓天遊象峯數年

大寧字石潮道盛弟子博洽能文嘗止錫武夷後主金陵

天界方丈著有詩文集

如疾字疵已龍溪人菴居內金井能詩善書嘗作武夷導遊記文詞典贍

超位號壽宗漳浦盧氏子黃石齋門人好學善詩文初居武夷以母老晝夜念不釋尋歸省依依膝下數年顧不能忘情是山乃奉母至擇山北之章堂結茅以歸母壽終葬曼陀巖廬墓三年遷歸漳浦合窆已還武夷選勝築室于筇巖曰莫庵傍有清泉湧出居恒靜坐言笑不苟而遇衆溫寬人多飯之其徒明開字鐵華亦漳人能傳其衣鉢雲遊京師

武夷山志

卷之十八

釋子

十八

誠親王賜以洞天花雨額恭懸庵內陳太史夢雷有送開明歸山序

道桓字竺民號凡木龍溪楊氏子八九歲喜讀古詩歌及長披緇居小九曲之泊庵卽事長吟遊者多稱之其徒明智字非固亦龍溪人好爲詩有踵事其師之意

衍操字松山漳浦劉氏子先世仕學相承有三劉之目衍操足跡遍四方歷有聲名晚得武夷山北之梧桐窠結茅居焉手不釋卷宛然儒者著語錄八卷詩集十餘卷性坦號櫛堯漳州諸生原名蔡仲修黃石齋門人能詩文居御茶園三載歸省祖塋卒年八十餘

淨清字千松泉州人能詩及尺牘居復古菴二十餘載足跡不至城市近今罕及年六十有三卒

超全號夢庵同安人俗姓阮名旻錫字疇生曾文忠公櫻門人棄諸生自稱輪山遺衲有海上見聞錄二卷慢亭遊詩文一卷

真熾字洞照號晦崖晉江人梧峯衍操弟子也

宗楷字雪芝別號鐵社善畫蘭又工書法與李懷之藍素先顧子燦號夷山四名士

超煌又名元煌字泉聲龍溪人俗姓陳居虎嘯善詩畫嘗主浙江天童法席

武夷山志

卷之十八

釋子

十九

武夷山志卷之十八終